

आकाशवाणी

खबरां

1. भारती अंतरिक्ष अनुसंधा संगठन इसरो नै गगनयान लेई पैहला एकीकृत एयर ड्राप परीक्षण कामयाबी कन्नै कीता ऐ।
2. रक्षा मंत्री राजनाथ सिंह होरें आखेआ जे देस अपने पैहले मानव अंतरिक्ष यान मिशन लेई पूरी चाल्ली तैयार ऐ जेड़ा आत्मनिर्भर भारत दी जात्तरा च इक नमा आध्याय ऐ।
3. भारत नै मती स्तरै आहली वायु रक्षा समर्थ स्थापित करने लेई एकीकृत वायु रक्षा हथियार प्रणाली दा पैहला डुआर परीक्षण कामयाबी नै कीता।
4. गृह मंत्री अमित शाह नै नमीं दिल्ली च अखिल भारती वक्ताएं दे सम्मेलन दा उद्घाटन कीता।
5. भारती मौसम विभाग नै पूर्वी राजस्था ते जम्मू-कश्मीर च मती भारी बरखा गी लेइयै रेड अलर्ट जारी कीता ऐ।
6. तीरंदाज च चिकिया तानीपारथी नै कनाडा च विश्व युवा चैंपियनशिप च कम्पाउंड अंडर-21 महिला वर्ग च भारत दा पैहला व्यक्तिगत तौरा पर सुन्ने दा तगमा जित्तेआ ऐ।

<><><><><><>

ISRO

भारतीय अंतरिक्ष अनुसंधान संगठन-इसरो नै गगनयान मिशन आस्तै पैराशूट आधारित पैहले एकीकृत एयर ड्रॉप टेस्ट-आईएडीटी - 01 दा परीक्षण कीता। एह महत्वपूर्ण अभ्यास अंतरिक्ष यात्रीं गी पैराशूट राएं सफलतापूर्वक तोआरने कन्नै सरबबंधत ऐ। एह परीक्षण इसरो, भारतीय वायु सेना, रक्षा अनुसंधान ते विकास संगठन, भारतीय नौसेना ते भारतीय तटरक्षक दे सांझे प्रयासें कन्नै कीता गेआ। इस परीक्षण च संपूर्ण पैराशूट दा प्रयोग कीता गेआ जेडा अंतरिक्ष यात्री गी पुनर्प्रवेश ते पानी च तोआरने दरान घट्ट गति ते स्थिर स्थिति च तोआरेआ गेआ। एहदे अलावा इसरो होरनें परीक्षणें दी तैयारी बी करा'रदा ऐ। इंदा मकसद भारत दे पैहले मानव सहित अंतरिक्षयान गी उड़ान दा रस्ता दस्सना ऐ।

<><><><><><>

Rajnath-Gaganyaan

रक्षामंत्री राजनाथ सिंह होरें आखेआ ऐ जे भारत अपने पैहले मानवयुक्त अंतरिक्ष मिशन गगनयाद आस्तै पूरी चाल्ली तैयार ऐ। उनें आखेआ जे एह महज तकनीकी उपलब्धि नेई ऐ बल्के आत्मनिर्भर भारत दी दिशा च इक्क नमा ध्याय ऐ। श्री सिंह होरें एह गल्ल नमी दिल्ली च गगन यात्रियें आस्तै आयोजित सम्मान समारोह च आक्खी। इनें यात्रिं च ग्रुप कैप्टन शुभांशु शुक्ला, प्रशांत बालकृष्णन नायर, अजीत कृष्णन ते अंगद प्रताप शामिल न। रक्षा मंत्री होरें आखेआ जे भारत बस उपग्रह अंतरिक्ष च नेई भेजा'रदा ऐ बल्के भारत नै अंतरिक्ष खेत्तर च पूरी दुनिया गी अपनी ताकत दस्सी ऐ। उनें आखेआ जे भारत नै चंद्रमा थमां लेइयै मंगल तगर अपनी उपस्थिति पैहले गै दर्ज कराई दी ऐ।

<><><><><><>

DRDO

रक्षा अनुसंधान ते विकास संगठन-डीआरडीओ नै एकीकृत हवाई रक्षा शस्त्र प्रणाली दा कल ओडिशा तट कश पेहला सफल परीक्षण कीता। इस बहु-स्तरीय स्वदेशी प्रणाली च ज़मीन थमां हवा च मार करने आहली मिसाइल, घट्ट दूरी दी उन्नत हवाई रक्षा प्रणाली आहली मिसाइल ते लेजर-चालित निर्दिष्ट एनर्जी शस्त्र शामिल ऐ। परीक्षण उड़ान दरान इस प्रणाली थमां बक्ख-बक्ख दूरी पर स्थित त्रै लक्ष्यें गी सफलतापूर्वक नष्ट कीता गया। इस अवसर पर संगठन दे वरिष्ठ वैज्ञानिकें दे अलावा सशस्त्र बलें दे प्रतिनिधि बी मौजूद हे। रक्षा मंत्री राजनाथ सिंह होरें परीक्षण उड़ान दी सफलता पर डीआरडीओ दे वैज्ञानिकें, सशस्त्र बलें ते रक्षा उद्योग गी बधाई दिती ऐ। उनें गलाया जे इस अनूठी प्रणाली की सफलता कन्नै देश दी बहु-स्तरीय हवाई सुरक्षा क्षमता स्थापित होई ऐ ते इससे देश दे रक्षा प्रतिष्ठानें दी सुरक्षा मज़बूत होग।

<><><><><><>

PM-FIJI

फिजी दे प्रधानमंत्री सिटिवेनी लिगामामादा राबुका भारत दे त्रै दिनी दौरे लेई अज्ज बडुलै नमी दिल्ली पुज्जे। श्री राबुका हुंदे कन्नै आए दे मंत्रीमंडल च सेहत ते मेडिकल सेवा, मंत्री रातू अटोनियो लालवालावु सने आला अफसर शामिल न। विदेश मंत्रालय नै इक बयानै च दस्सेआ जे प्रधानमंत्री राबुका हुंदी भारत दी एहू पैहली जात्तरा ऐ। श्री राबुका कल प्रधानमंत्री नरेंद्र मोदी हुंदे कन्नै गल्लकत्थ करंगन। उंदा राष्ट्रपति द्रौपदी मुर्मू हुंदे कन्नै बी मलाटी लाने द कार्यक्रम ऐ।

<><><><><><>

Amit Shah-Speakers Conference

केंद्री गृह मंत्री अमित शाह होरें अज्ज राश्ट्रीय राजधानी स्थित दिल्ली विधानसभा च द'ऊं ध्याडे दे अखिल भारती स्पीकर सम्मेलन दा उद्घाटन कीता। एहू सम्मेलन विठ्ठलभाई पटेल हुंदे भारत दे पैहले केंद्री विधानसभा अध्यक्ष दे रूप च निर्वाचन दी शताब्दी वर्षगांठ दे उपलक्ष्य च आयोजित कीता जा'रदा ऐ। इस मौके पर बोलदे होई गृह मंत्री होरें इस गल्ला पर जोर पाया जे जिस चाल्ली देश दी स्वतंत्रता महत्वपूर्ण ही, उसै चाल्ली एहू सुनिश्चित करना बी जरूरी ऐ जे स्वतंत्रता दे बाद राश्ट्र लोकतांत्रिक रूप कन्नै संचालित होऐ। उनें आखेआ जे विठ्ठलभाई पटेल होरें भारतीय विचारें पर आधारित लोकतांत्रिक शासन दी स्थापना दी नींह रक्खी। मौजूद कट्ट गी संबोधित करदे होई संसदीय कार्य मंत्री किरें रिजिजू होरें आखेआ जे दो ध्याडे दे स्पीकर सम्मेलन सर्वोत्तम प्रथाएं गी सिक्खने आस्तै अत्त उपयोगी ऐ। इस मौके पर गृह मंत्री होरें विठ्ठलभाई पटेल हुंदे सम्मान च इक्क स्मारक डाक टिकट जारी कीता। शाह होरें भारत दे प्रथम निर्वाचित अध्यक्ष ते भारत दी संसदीय संस्थाएं दे विकास पर दुर्लभ अभिलेखीय अभिलेखें, सस्वीरां ते दस्तावेजें गी प्रदर्शित करने आहली इक विशेष प्रदर्शनी दा बी उद्घाटन कीता।

<><><><><><>

PM-Gujrat

प्रधानमंत्री नरेन्द्र मोदी कल्लै थमां दऊं दिनें दे गुजरात दौरे पर जाडन। ओहू अहमदाबाद च कल 5 ज्हार 400 करोड़ रपे दी विकास परियोजनाएं दा उद्घाटन करडन। श्री मोदी

होर इक्क सभा गी बी संबोधित करडन। गुजरात यात्रा दे दूसरे दिन, प्रधानमंत्री अहमदाबाद दे हंसलपुर च हाइब्रिड बैटरी इलेक्ट्रोड उत्पादन दा उद्घाटन करडन। ओह बैटरी कन्ने चलने आहले सौ देशों गी निर्यात होने आहले इलेक्ट्रॉनिक गड्डिं दी खेप गी बी हरी झंडी दस्सडन। प्रदेश दी यात्रा दौरान श्री मोदी 1 ज्हार 400 करोड़ रुपये लागत आहली रेल परियोजनाएं गी बी राष्ट्र गी समर्पित करडन। ओह विरामगाम-खुदाद-रामपुरा रोड दे विस्तारीकरण दा उद्घाटन बी करंगन। श्री मोदी अहमदाबाद-मेहसाणा-पालनपुर रोड पर छह-लेन आहले अंडरपास दे निर्माण दी आधारशिला बी रक्खंगन। ओह अहमदाबाद-विरामगाम रोड पर रेलवे ओवरब्रिज दा बी शिलान्यास रखडन।

<><><><><><>

PM Shri Granth Sahib

प्रधानमंत्री नरेंद्र मोदी होरें श्री गुरु ग्रंथ साहिब जी हुदें प्रकाश पर्व पर शुभकामनां दित्तियां न। इक सोशल मीडिया पोस्ट च श्री मोदी होरें आखेआ जे श्री गुरु ग्रंथ साहिब जी हुंदी साश्वत शिक्षां, दुनिया भर दे लोकें दे जीवन गी प्रकाशित करदी रौहंदी ऐ ते असेंगी करुणा, विनम्रता ते सेवा दे मूल्लें दा चेत्ता नुआंदियां न।

<><><><><><>

Rajnath-Visit

रक्षा मंत्री राजनाथ सिंह होर अज्ज दपैहरी जम्मू पुज्जे ते इत्थें पुज्जदे गै ओह जीएमसी जम्मू पुज्जे जित्थे उनें किश्तवाड़ जिले दे चशौती ग्रांड च हाल च गै बद्दल फट्ने आहली कुदरती क्रोपी च जखमी होए दे लोकें दा हाल पुच्छेया। जखिमयें कन्नै मिलने परैत श्री

सिंह होरें आखेआ जे ओहू बी हाड़ कन्नै प्रभावित थाहर चशौती जाना चाहंदे हे, पर खराब मौसम करियै एहू मुमकन नेई होई पाया। उनें दस्सेआ जे अस्पताल च दाखल लोकें दा इलाज कीता जा करदा ऐ ते उंदी हालत स्थिर ऐ। अपने दौरे परेंत रक्षा मंत्री होरें दिल्ली आस्तै वापस परतोई गे ना। ध्यानजोग ऐ जे चशौती च कुदरती क्रोपी कन्नै नेकें लोकें दी जान चली गई ते नेकां अजें बी लापता ना।

<><><><><><>

Punjba Free Food Grain

केंद्री उपभोक्ता मामले, खाद्य ते सार्वजनिक बंड सरबंधी मंत्री प्रहलाद जोशी होरें आखेआ जे पंजाब दे इक करोड़ 41 लक्ख लाभार्थीं गी मुफ्त अन्नदाना थ्होंदा रौहगा। इक सोशल मीडिया पोस्ट च जोशी होरें आखेआ जे केंद्र नै राश्ट्री खाद्य सुरक्षा अधिनियम 2013 तैहत राज्य च इक बी लाभार्थी गी नेई हटाया ऐ। मंत्री कल पंजाब दे मुख्मन्त्री भगवंत मान हुंदे आसेआ लाए गेदे आरोपें पर प्रतिक्रिया देआ'रदे ना।

<><><><><><>

IMD

भारती मौसम विभाग नै पूर्वी राजस्थान ते जम्मू-कश्मीर च मती भारी बरखा बरने सरबंधी रेड अलर्ट जारी कीता गेआ ऐ। मौसम विभाग नै पूर्वी मध्य प्रदेश, गुजरात, हरियाणा, चंडीगढ़, दिल्ली, पंजाब, उत्तराखंड ते पच्छिमी राजस्थान च किश थाहरें पर भारी थमां मती भारी बरखा बरने दी पेशगोई कीती ऐ। भारी बरखा करी बिहार ते राजस्थान च जमी-जयदाद ते फसलें गी भारी नुकसान पुज्जा ऐ। राजस्थान च पिछले 3

दिनें च कई जिले च भारी बरखा दे बाद सामान्य जनजीवन बुरी चाल्ली प्रभावित होआ ऐ। दौसा च भारी बरखा होई ऐ जिस्सलै के अलवरा जयपुर, सवाई, माधेपुर, सीकर ते टोंक च भारी बरखा करी झिगड़े इलाके च पानी भरोची गेआ ऐ।

<><><><><><>

Heavy-Rainfall

जम्मू खित्ते च जंदी अज्ज बडुलै थमां होआ करदी भारी बरखा करी केई इलाके च हाड़ जेह् हालात पैदा होई गेदे न। भारी बरखा करी रिहायशी इलाके च पानी किट्टा होने करी सिड़के ते घरे-मकाने गी बी नुक्सान पुज्जा ऐ। भारी बरखा ते हाड़ करी जम्मू-पठानकोट जरनैली सिड़के पर सहर खड्डु उप्पर बनाए गेदे पुल गी नुक्सान पुज्जा ऐ। मौसम विभाग कल आस्तै बी जम्मू, डोडा, किश्तवाड़, पुंछ, रजौरी, रामबन, रियासी, सांबा, कठुआ, उधमपुर, अनंतनाग ते कुलगाम च बड़ी भारी बरखा दी पेशगोई कीती दी ऐ। सरबन्धत अधिकारिएं प्रदेश च ते खास करियै जम्मू संभाग च केई सारी थाहें पर बदल फटने, चानचक्क हाड़ औने ते ल्हास-पस्सियां पौने दी शेंका बी जाहिर कीती ऐ। मौसम विभाग नै कल्लै तोहड़ी इयै नेह् हालात बने दे रौहने बारै सोहगा सतर्क करदे होई बसनीके गी सलाह दित्ती ऐ जे ओह् अपनी सुरक्षा जकीनी बनाने लेई सब्भै लोड़चदी एहतियातां बरतन ते बेवजह सफर कोला बी परहेज करना।

<><><><><><>

CM-Alert

जम्मू-कश्मीर च जारी भारी बरखा दे मद्देनज़र मुखमन्त्री ओमर अब्दुल्ला होरें सब्भनें सरबन्धत मैह्कमें गी निर्देश दित्ते न जे ओह हाई अलर्ट पर रौह्ना। ध्यानजोग ऐ जे संभाग दे बक्ख-बक्ख हिस्सें च जंदी रातीं थमां होआ करदी भारी बरखा करी केई इलाकें च पानी भरोची गेदा ऐ ते नदी-नाले खतरे दे निशान कोला उप्पर बगा करदे ना। सरकारै, सरबन्धत नियंत्रण कक्षें गी सक्रिय करी दित्ते दा ऐ ते मुखमन्त्री हुं'दे दफ्तरै, सब्भनें मैह्कमें कन्नै लगातार राबता बनाए दा ऐ। रिहायशी इलाकें च जमा होए दे पानी गी कडुने ते बिजली ते पानी ज्नेही अत्त लाज़मी सेवाएं दी ब्हाली बक्खी चेचा ध्यान दित्ता जा'रदा ऐ। लोकें गी सौह्गा रौह्ने दी सलाह दित्ती गई ऐ। राहत ते बचाऽ टीमें गी कुसै चाल्ली दे बी हालात कन्नै निब्बड़ने लेई तैयार बर तैयार रक्खेआ गेदा ऐ।

<><><><><><>

IIIM-Flood Water

भारती एकीकृत चिकित्सा संस्थान आई.आई.आई.एम दे घट्टोघट्ट 45 विद्यार्थियें गी अज्ज राज्य आपदा प्रतिक्रिया बल एसडीआरएफ ते पुलिस दे सांझे अभियान च सुरक्षित कडुी लैता गेआ। ध्यानजोग ऐ जे संस्थान दे होस्टल दे ग्राउंड फ्लोर च पानी जमा होई गेदा हा। अज्ज बडुलै नैहरा दा 7 फुट शा बद् पानी होस्टल दियें इमारतें च जाई बड़ेआ जिस करियै एसडीआरएफ ते पुलिस नै विद्यार्थियें गी उत्थुआं सुरक्षित कडुने आस्तै किश्तियें दी मदाद लैती। दस्सेआ गेआ ऐ जे बचा अभियान 5 घंटें शा बी बद् समें तोड़ी चलेआ ते फसे दे सब्बने विद्यार्थियें गी सुरक्षित कडुी लैता गेआ। आई.आई.आई.एम दे निदेशक डॉक्टर जबीर अहमद होरें दस्सेआ जे संस्थान नै विद्यार्थियें दे सुरक्षित रौह्ने दी पूरी बवस्था करी लैती ऐ।

<><><><><><>

Archery

तीरंदाजी च भारत दी चिकिथा तानीपारथी नै कनाडा च विश्व युवा चैंपियनशिप च कम्पाउंड अंडर-13 महिला वर्ग च देसा दा पैहला व्यक्तिगत स्वर्ण पदक जित्तेआ ऐ। उनें इस मुकाबले च दक्खन कोरिया दी वेरिन पार्क गी हराइयै एह सुन्ने दा तगमा जित्तेआ ऐ। चिकिथा नै पैहली भारती महिला व्यक्तिगत कम्पाउंड जूनियन विश्व चैंपियन बनियै इतिहास रची दित्ता।

<><><><><><>

US Open Tennis

टेनिस च यू.एस ओपन दा 145मां संस्करण अज्ज रातीं न्यूयार्क च शुरू होग। पुरुष एकल च विश्व दे नंबर इक ते गत विजेता इटली दे जैनिक सिनर विश्व दे दुए नंबर दे खडारी सपेन दे कार्लोस अल्काराज कन्नै मिलियै अगुवाई करंगन। महिला वर्ग च बेलारूस दी नंबर इक इगा स्विएटेक ते 2023 दी चैंपियन कोको गाफ अपनी छाप छोड़ने दी कोशश करंगन। पैहले दौर दे मैच भारती समें मताबक रातीं साडढे 8 बजे शुरू होंगन।

<><><><><><>